



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Sancta Communitas, In Paupertate religiosa inviolata**

**Wissingh, Anton**

**Coloniae Agrippinae, 1699**

Pax ☩ Salus, Cor unum, & Anima una

[urn:nbn:de:hbz:466:1-49611](https://nbn-resolving.org/urn:nbn:de:hbz:466:1-49611)



# PAX ✠ SALUS,

Cor unum , & Anima una

*Patribus , & Fratribus Provincia Coloniensis , dilectissimis in Christi IESU visceribus.*

Vobis reddo rationem Operis , expono causam hujus mei suscepti laboris : quæ quamvis quadruplex potissimum sit , *Prima* tamen inductiva estis vos , qui estis , & posthac amplius eritis gaudium meum , gloria mea , & corona mea in Domino. Communis salus vestra , unitas vestra , profectus vester , securitas conscientiarum vestrarum meum excitârunt animum , manum applicârunt ad calamum , dispulère fastidium , immo laborem hunc quantulumcumque reddidère jucundum. Vobis enim quæro non placere , sed proficere , immo & proficiendo placere , sed in Domino , & propter vos ; quod est charitati servire , ait *D. August.* Spero , quòd hæc litera , immo potius candida & sincera intentio mea in vobis promovebit amorem Ordinis , unionis , & observantiæ ; Ordinis , in quo sint *omnia communia* ; Act. 4. Unionis , quæ odit privata , separata , disparata ; & observantiæ , quæ exactè innititur *S. Regulæ , & Constitutionibus*. Hæc tria si videro in vobis , gaudens gaudebo , & finem laboris mei , immo opratum quasi præmium reportavero. Nam de his meritò dico & sentio cum literatissimo *Michaele Ghislerio* in c. 6. Cant. expos. 2. §. 1. *quid*



quid ordinatius in hoc mundo conspici potest, quam recte instituta Religiosorum conversatio? quid eorumdem unione jucundius? quid eorum observantius venustius? quid tranquillitate suavius? quid studiis, spiritualibusque exercitiis fructuosius? h. i.

Itaque obsecro vos Fratres, (cum Apostolo in var. ll.) per nomen D. N. J. C. ut fitis perfecti in eodem sensu, & in eadem sententia -- solliciti servare unitatem Spiritus in vinculo pacis; ---- nam & pro invicem sollicita sunt membra--. Idem sapiatis, eandem charitatem habentes, unanimes, id ipsum sentientes-- non enim estis vestri--. Hinc, sicut ego in hoc Opere non sum quærens, quod mihi utile, sed quod multis; ita nec quisquam inter vos, quæ sua sunt, singuli considerantes, sed quæ aliorum. h. 7. Hoc ut commune bonum assequamur & tueamur, levemus capita nostra, Christi-formes studeamus facere affectus nostros: & sicut aqua quamvis ob naturalem gravitatem deorsum feratur, quærens centrum suum, at, dum natura horret vacuum, ob bonum commune ascendit sursum; sic & nos, quamvis naturæ aliter habituatæ fortè violentum videatur, attamen pro communi bono, ne maneant corda vacua divina gratia, sursum feramur, quò Deus vocat, quò Christi Vicarius incitat, quò regularis professio extimulat, propriæque salutis spes adurget. Paulò altius ascendamus, ut in gratia Dei crescamus.

Ex nunc ergo, ut loquar cum *Basil. M. Constit. monast. c. 18.* Sint nobis communia universa, anima, sententia, corpora, & ea quibus corpora nutriuntur, &



Et ad bene pièque vivendū opitulantur. Communis Deus, communis pietatis negotiatio, communis sal<sup>us</sup>, communia certamina, jejunia, labores, orationes, corona. Multi unus, & unus non solus, sed in pluribus. h. i.

Secunda causa impulsiva fuit amor decoris & honoris, quò zelare meritò teneor pro Matre mea, quæ est Religio nostra. De quo cit. Michael Ghisler, in cant 8. expos. 3. §. 1. Religiosus bonus ardentè desiderat Religionis suæ profectum. Hinc & mihi evenit, quod ibidem apertius asserit §. 8. super illa verba, apprehendam te, & ducam te in domum Matris meæ. Religiosus, inquit, bonus, quamcumque in aliis Monasteriis viderit virtutem, vel observantiam, in qua Deus sibi manifestetur, apprehendit amoris desiderio, conaturque deferre in claustrū Religionis suæ, quæ cum ut Mater ad vitam genuit spiritalem, & educavit corporaliter & spiritaliter. h. i. Verè etenim ita est, quòd cordis ardens desiderium in me senserim ab initio religiosæ vocationis meæ, ut, quam apud alios Religiosos inveni ex perfecta communitate genitam charitatem, amabilitatem, fraternitatem, socialitatem, regularitatem, exemplaritatem, animorum unionem, fraternam ad invicem confidentiam, serviendi promptitudinem, angelicam obedientiam, paupertatis rigidam observantiam, à sæculo abstractionem, & aliarum virtutum religiosarum multiplicè sobole, possem sancto furto transferre, & etiam aliquando videre inter Religionis Matris nostræ Filios, meos scilicet, Confratres, Vos, inquam, quos alloquor corde, voce, scripto; quo-

quo-



quorum animas suo sanguine pretioso subsignavit Christus, meæque fidei concredidit; quos ideoque, & simul me ipsum sub pallio *SSmæ V. M. Dei Genitricis*, Ordinis nostri Seraphici singularis Protectricis, substerno ejusdem *sacratissimo Cordi*, quod insignitum est Crucifixo; ut, quia concepit eum, qui renovavit faciẽ terræ, renovet & me, & vos & singula membra Religionis nostræ.

*O Sancta! ô optata! ô diu desiderata, & tam diu, tam sollicitè quaesita S. Communitas!* Quis mihi det, ut *introducā te in domum Matris meæ?* utinam te saltem ex nunc, afflante S. Spiritu, Patrocinate B. V. M. nec non *S. P. N. Francisco, S. Antonio Patavino*, & omnibus Sanctis, possem hoc voto meo, hac prece, hoc opere introducere in domum Religionis nostræ, vel saltem hujus Colonienſis Provinciæ! Quod sicut juravi & statui Coram vobis in initio suscepti hujus ministerii, sic nunc iterum juro, pro quanto divina gratia adjuverit. Et hæc est

*Tertia causa* hujus suscepti Operis, ut scil. juramento meo satisfacerem, nihil intentatum relinquendo, quod ad ejus adimplentionem conducens, aut necessarium reperero. Saltem faciam id, quod in vita *S. P. N. Francisci* c. II. §. 3. scribit *S. Bonav. exonera conscientiam tuam, & Deum magis time, quàm homines. h. i.*

*Quarta causa*, quæ animum & manum confirmavit in hoc Opere literario lætiùs perficiendo, fuit *Eminent. & Rdis. Protectoris nostri Cardinalis LEANDRI COLLOREDI* paterna, fervens, cordialis, ac sollicita in- & excitatio; qui cum sit Dominus

minus



minus *Gubernator*, *Protector*, & *Corrector* hujus nostræ Fraternitatis; exhortatur, instat, obsecrat nos à tam sancto proposito non desistere, quousque in omnibus formetur Christus. Cujus primæ gratiosæ Epistolæ tenorem vide infra pag. 430.

Itaque Fratres mei dilectissimi & desideratissimi, hujus pientissimi nostri D. Protectoris votis respondeamus: sanctamq; matrem Ecclesiam, quam B. P. N. *Francisci* meritis fetu novæ prolis indies amplificat misericors Deus, per nostri ipsorum spontaneam renovationem, novo gaudio lætari faciamus; immo gaudium hoc ejus & nostrum notum sit omnibus hominibus. Confideremus cum S. *Chrysof.* in Joan. *quantò paucioribus indigemus, tantò magis Angelis appropinquamus, quantò pluribus, tantò magis ad hanc caducam vitam defletemus*: Ideoque S. paupertatem, ejusque filias & comites amplectamur, per quas Angelis Sanctis reddamur similiore. Itidem perpendamus cum *Rusbrochio*, *vitium planè diabolicum esse, quòd res terrena communes non sint*; ideoque sacram Communitatem semper & in omnibus sectemur; bono autem privato & lucro inhiare, detestabile vitium æstimemus. Quod rarum in terris est, nobis carum sit; *Est autem tamen in terris rarum Monachus, in quo non est reperta cupiditas*, aiebat S. *Ephrem*. Caveamus, ne nos feriat lethalis comminatio prædicta per S. *Hypolitum Mart. consummationis mundi, & extremitatis illius signum est, si Monachi expetant, que sunt mundi*. Tandem enitatur unanimiter, ut annus proximus communis Jubilei, qui est

\*\*

hujus



Hujus sæculi completiv' utpote septingentesimus post millesimum, inveniatur quoque nos de nostri ipsorum renovatione jubilantes, ad altioraque perfectionis culmina aspirantes, demumque perseverantibus promissa æterna præmia longanimiter expectantes.

Quilibet vestrum ( loquar verbis R. diff. P. N. Jacobi Bagnacaballensis in Epistola Pastoralis, Coloniae typò data 1619. 6. Jan. de reformat. studiorum ) accepta hac mea Pastoralis epistola, & admonitione paterna, pravos & jam penè inveteratos usum præcedentes, noxias corruptelas exterminantes, deliberato quisque constituat animo, certum perfectioris observantia iter instituere, peculii proprietatem, (pondus certè nimis onerosum) deponendo, & sanctam vitam communis institutionem, seclusa omni reluctatione, subeundo--- vitam communis institutum observantissimè excolendo; quæ vita est celestis, vita Angelica, vita Apostolica, & quidquid Deo professione solenni devovimus, exactè & ad amissim observando--- Et sicut B. Franciscus Pater noster Seraphicus fuit voce calitus demissa instructus: Vade Francisce, repara domum meam, quæ labitur; illud nobis ipsum singulis putare debemus enuntiatur, & cum Paulo Apostolo dictum: labora, sicut bonus miles Christi Jesu,--- Testem invoco Deum & Dominum nostrum Jesum Christum, quo animo, qua mente, quo consilio, in hac mea visitatione omni conatu enitar ( dicam ego, hoc à me edito libro ) omnem depromam curam & diligentiam, in res ad pristinum cultum revocandi, observantia inducendi, regularem disciplinam instaurandi,



( 0 )

randi, exteriora dedolandi, perpoliendique; & quos  
divino cultui atque observantia addictiores nove-  
rim, ad regimina promovendi; ut bono eorum,  
quod statuere debent, exemplo, pauxilla & minu-  
tula nostra Religionis reliquia, in seipsis conserven-  
tur & excrescant ad Dei gloriam, proximi ædi-  
ficationem, & propriarum animarum perpetuam  
salutem; Quam ex corde & faveo & apprecor  
vobis. Enitami, ut eam assequamini. Valete  
in Domino, orantes pro vestro in Christo Mini-  
stro, cui nihil debet esse antiquius, quam, ut quo-  
quo modo valeo, bene & utiliter de mea Religione  
merear. h. i. in Decreto de reform. stud. †



\*\*\* 2

Ad